

## Dumonda Tomaschett (Breil) concernent la cunvegna da prestaziun tranter il chantun Grischun e la Pro Natura Grischun

Per ils onns 2020-2024 ha la Regenza approvà – tenor la comunicaziun da la Regenza dals 10 da december 2020 – ina cunvegna da prestaziun tranter il chantun e la Pro Natura Grischun. La cunvegna duai reglar resp. indemniser la tgira da territoris da protecziun cun ina contribuziun chantunala annuala dad 800 000 francs e cun ina contribuziun federala da la medema autezza.

Pro Natura Grischun protegia mintga onn surfatschas da biotops da var 120 hectaras. Bundant la mesadad da quai è biotops d'impurtanza naziunala. L'organisaziun per la protecziun da la natira Pro Natura Grischun è però er enconuschenta per il fatg ch'ella s'exprima en moda critica u negativa envers quasi tut ils projects da svilup ordaifer la zona da construcziun e ch'ella emprova uschia d'evitar, da retardar e da render pli chars tals. Projects ed infrastructures ch'èn per gronda part ina premissa fundamentala per il survivor en il territori da muntogna vegnan uschia adina puspè impedids. Daners publics dal svilup economic na cuntanschan nagin effect, perquai che l'applicaziun excessiva dal dretg da recurs da las associaziuns da vart da Pro Natura e d'autras NGOs enchareshescha u impedescha sistematicamain ils projects da svilup.

La Regenza vegn supplitgada da responder las suandantas dumondas:

1. È la cunvegna da prestaziun en la dimensiun da totalmain 1,6 milliuns francs vegnida publitgada uffizialmain tenor la Lescha da submissiun? Sche na, pertge betg?
2. Èn vegnidas dumandadas «offertas da concorrenza» u fatgas cumparegliazions cun outras prestaziuns (p.ex. tariffas per ura) che giustifitgeschan da giuditgar la relaziun tranter il pretsch e la prestaziun (indemnisaziun da 13 333 francs per ha u dad 1.33 francs per m<sup>2</sup>)?
3. Na pudess – ord vista da la Regenza – l'incumbensa da tgirar territoris da protecziun betg er esser interessanta per interpresas privatas u per l'agricultura e co vegni impedì che la tgira da las surfatschas da biotops na vegn betg subvenziunada duas giadas cun pajar er pajaments directs a las puras ed als purs per las medemas surfatschas?
4. Tenor la comunicaziun a las medias è la cunvegna da prestaziun vegnida fatga per la perioda dals onns 2020 fin 2024. È questa cunvegna da prestaziun entrada en vigur retroactivamain?
5. Giuditgescha la Regenza quai sco raschunaivel da far ina cunvegna da prestaziun cun ina NGO (probablmain senza submissiun) che fa – cun contribuziuns da sustegn, cun daners da donaziuns e cun meds finansials gudagnads sezs sco p.ex. or da questa cunvegna da prestaziun – protestas e campagnas da votaziun cunter ils interess da la Regenza resp. dal chantun e co garantgescha la Regenza che las contribuziuns na vegnian betg duvradas per proceduras da protesta e da recurs charas cunter projects chantunals?

Tavau, ils 18 da favrer 2021

**Tomaschett (Breil)**, Engler, Grass, Berther, Berweger, Brandenburger, Brunold, Casty, Casutt-Derungs, Cramer, Danuser, Della Cà, Della Vedova, Deplazes (Rabius), Derungs, Dürler, Epp, Felix, Flütsch, Föhn, Giacomelli, Gugelmann, Hardegger, Hefti, Kasper, Kienz, Kohler, Kunfermann, Lamprecht, Loepfe, Mittner, Müller (Susch), Natter, Niggli (Samedan), Niggli-Mathis (Grüsch), Papa, Paterlini, Ruckstuhl, Sax, Schmid, Schutz, Stiffler, Thomann-Frank, Ulber, Weber, Zanetti (Landquart), Bürgi-Büchel, Collenberg, Heini